
ФАРҶОНА ҲАМДА ТОҶИКИСТОННИНГ ВИЛОЯТЛАРИ ҲАМКОРЛИГИ ЯНАДА РИВОЖЛАНАДИ

Вилоят ҳокими Хайрулло Бозоров Тоҷикистон Республикасининг Ўзбекистондаги Фавқулодда ва Мухтор элчиси Абдужаббор Раҳмонзодани қабул қилди.

Самимий мулоқот чоғида Фарғона вилояти ҳамда Тоҷикистоннинг вилоятлари ўртасида тўғридан тўғри ҳамкорлик алоқаларини янада ривожлантириш масалалари муҳокама қилинди.

Ишбилармон доиралар ўртасидаги алоқаларни фаоллаштириш, саноат, қишлоқ хўжалиги, хусусан пахтачилик, пиллачилик ва боғдорчилик, туризм соҳаларида ҳамкорликни, маданий-гуманитар алоқаларни ривожлантириш борасида фикр алмашилди.

Элчи Абдужаббор Раҳмонзода 2021 йилда вилоятимизда ўтказилган Фарғона-Баткен-Сўғд халқаро бизнес-форумида Фарғона вилояти ва Сўғд вилояти ўртасида имзоланган савдо-иқтисодий ҳамкорликни ривожлантиришга қаратилган “Йўл харитаси”, Хайрулло Бозоров бошчилигидаги Фарғона вилояти делегациясининг 2022 йил 8-9 сентябрь кунлари ўзаро ҳамкорликни ривожлантириш мақсадида Тоҷикистоннинг Сўғд вилоятига ташрифи ҳамда бу ташриф давомида имзоланган келишувлар, икки вилоят ўртасида ҳудудлараро ҳамкорликни янги босқичга олиб чиққанини қайд этди.

Қишлоқ хўжалиги ва саноат соҳаларида қўшма лойиҳаларни амалга ошириш, Тоҷикистон вилоятларига Қўқондаги Indorama корхонасида ишлаб чиқарилаётган ўғитларни экспорт қилиш, Фарғона вилояти ва Тоҷикистон театрларининг ўзаро гастролларини ташкил этиш, Душанбеда бўлиб ўтадиган олий таълим муассасалари халқаро форумида вилоятимиз олийгоҳлари ректорлари иштирокини таъминлаш, зиёрат ва тиббий туризм йўналишларида ҳамкорлик қилиш каби масалаларда ўзаро ҳамфикрлиikka борилди.

Бешариқ туманининг Тоҷикистон билан чегарадаги “Андархон” назорат-ўтказиш пункти ёнидаги майдонда яқин кунларда тамал тоши қўйилиб, қурилиш ишлари бошланадиган “Қўқон” эркин иқтисодий зонасига боғлиқ эркин савдо зонаси минтақавий улгуржи ва чакана савдони ривожлантириш учун катта имконият яратиши қайд этилди.

Жорий йилда Фарғона вилояти ҳамда Тоҷикистоннинг Хатлон вилояти ўртасида ҳудудлараро ҳамкорлик ўрнатиш бўйича ҳам келишиб олинди.

Учрашувда Тоҷикистон элчихонасининг савдо масалалари бўйича вакили Шахбоз Шоев ҳам иштирок этди.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2023-02-07 20:54:43